

ECER umum lapan pelaburan baharu bernilai RM2.59 bilion

Astro Awani

Ogos 13, 2015

Wan Syamsul Amly,

PUTRAJAYA: Sebanyak lapan pelaburan baharu bernilai RM2.59 bilion diumumkan Pelaburan Wilayah Ekonomi Pantai Timur (ECER) bagi Suku Kedua tahun ini.

Ketua Pegawai Majlis Pembangunan ECER (ECERDC) Datuk Seri Jebasingam Issace John dalam satu kenyataan berkata, angka itu mewakili sebanyak 21.6 peratus daripada jumlah sasaran pelaburan ECER bagi tahun ini.

"Ia juga dianggar mewujudkan sebanyak 4,832 peluang pekerjaan baharu untuk rakyat.

"Sehingga Jun, ECER berjaya mencatatkan pelaburan bernilai RM6.3 bilion atau lebih separuh daripada sasaran pelaburannya untuk tahun ini iaitu sebanyak RM12 bilion.

"Wilayah tersebut kini berada di kedudukan yang kukuh untuk mencapai sasaran pelaburan tersebut menjelang akhir tahun ini," katanya.

Mesyuarat yang diadakan buat kedua tahun ini dipengerusikan Perdana Menteri, Datuk Seri Najib Tun Razak yang juga Pengerusi ECERDC.

Pada majlis sama, ECERDC turut mengumumkan kerjasama dan bertukar dokumen memorandum persefahaman (MoU) dengan Universiti Swansea, United Kingdom dan Universiti Malaysia Pahang (UMP) yang bakal membuka laluan bagi kolaborasi antara pihak universiti dan akademik di ECER sendiri.

Selain itu ia akan mempromosikan kerjasama antara kedua-dua universiti tersebut dalam bidang akademik dan penyelidikan.

Di bawah MoU tersebut, kedua-dua universiti berkenaan akan menjalin kerjasama dalam aktiviti penyelidikan dan akademik yang antara lain meliputi pemindahan ilmu dan pembangunan produk untuk tujuan komersial, memudah cara kemasukan bagi kursus dan program pengajian di universiti masing-masing serta pertukaran kakitangan dan pelajar.

Dalam pada itu, UMP, Universiti Sultan Zainal Abidin (UniSZA) dan Universiti Malaysia Kelantan (UMK) turut dilantik sebagai penyedia latihan bagi Program Latihan Kemahiran dan Keusahawanan empower ECER.

Sejak 2007, ECER berjaya menarik pelaburan dari dalam dan luar negeri berjumlah RM78 bilion yang merupakan 71 peratus daripada jumlah sasaran pelaburan sebanyak RM110 bilion menjelang tahun 2020 sekali gus dijangka mewujudkan 76,120 peluang pekerjaan baharu untuk rakyat.

Kata Issace lagi, dari segi sektor, kluster pembuatan merupakan penyumbang terbesar dengan pelaburan bernilai RM44.35 bilion diikuti sektor pelancongan (RM13.56 bilion), bio-ekonomi (RM5.62 bilion) dan minyak, gas dan petro-kimia (RM4.8 bilion).

Jelasnya, salah satu kejayaan utama ECER ialah taburan pelaburan di Wilayah tersebut adalah seimbang dengan meliputi kedua-dua kawasan bandar dan luar bandar.

"Selain kewujudan taman-taman perindustrian di Zon Ekonomi ECER (ECERSEZ), ECER turut menerima komitmen pelaburan bagi kawasan luar bandar di Wilayah tersebut seperti di Gua Musang, Kelantan, Besut (Terengganu), Jengka dan Rompin (Pahang) serta Mersing (Johor) yang akan mewujudkan peluang pekerjaan dan perniagaan untuk masyarakat setempat.

"Taman-taman perindustrian di ECER seperti Taman Industri Kuantan Malaysia-China (MCKIP), Taman Automotif Pekan, Taman Biopolimer Kertih, Taman Bio Bersepadu Kuantan, Taman Halal Gambang dan Taman Halal Pasir Mas.

"Semua taman ini menarik minat pelabur kerana keunikan dan saing masing-masing dengan nilai pelaburan terkumpul berjumlah RM24.7 bilion sehingga kini dan mewujudkan 14,809 peluang pekerjaan baharu," jelasnya.

© 2015 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/ecer-umum-lapan-pelaburan-baharu-bernilai-rm2-59-bilion-69627>